



風颳天

「九月颳，無人知」，若講著風颳，就予我想起細漢的代誌。彼年可能是讀小學二、三年的時陣，電視報講有大風颳欲來，阿爸佢阿母攏足緊張的，因為阮兜一片是破草厝、一片是瓦厝，早就離離落落矣。兩片厝頂本來就勢漏雨，這馬閣有風颳來鬥鬧熱，當然是掣咧等。

會記得彼工的欲暗仔，阿母煮甲誠腥臊，才拄喝食飯爾，阿爸就講：「袂赴矣！」叫逐家緊攢攢咧，講欲去覷風颳。阿母偕彼陣猶是幼嬰仔的外甥仔，我佢大姊、二姊、四姊，一人慢一領雨幔，就緊出門走去三叔遐覷，留阿爸佢三兄顧厝。風雨真正愈來愈大，行到橋頂的時，阿母叫阮用爬的，才袂予風煽落去溪仔底。行誠久才到三叔個兜的門跤口，阮姊妹仔隨大聲喝：「三叔仔，緊開門喔！」一擺閣一擺，一直大聲喝，毋過內底的人，敢若攏無聽著。阮只好大力拚門，這陣才聽著三叔講風雨傷大，大門毋敢開開，愛阮趲去後尾門。誠無簡單爬到位，我的跤盤煞去予鐵線勾著，血流袂停，到今猶有一个疤。

隔工風颳走了後，阮一家伙隨轉去厝，看阿爸走出走入，我隨綴去看，原來是斷去的煙筒管共灶跤的厝頂拚破一空，阿爸講好佳哉，昨暝走了緊，若無就害矣！尾手阿爸佢三兄共斷去的煙筒管扛去外口，閣跔去厝尾頂補厝瓦。原來園佇厝後彼兩捆瓦片，就是這款時陣欲用的，莫怪阿母普通時就三叮嚀四吩咐，袂使去面頂跔踏。

繼落來，阿公佢二姊去溪仔邊掠毛蟹，阿母佢四姊佢我去拈風拍筍，逐家攏足無閒，猶毋過嘛真歡喜，因為有幾若工的腥臊通食。佇物資欠缺的年代，有通補喙空，就予人有一種幸福的感覺。

覷風颳這齣戲，一冬著愛搬幾若擺，一直到讀四年仔搬厝了後才結束。這馬想起來，袂輸咧搬電影全款，遐爾仔刺激。逐擺講予囡仔聽，個攏感覺誠好耍，我的心肝內煞有淡薄仔數念，嘛有淡薄仔稀微。

作者：邱碧華

☆詞彙學習☆

【瓦厝】hiā-tshù：瓦舍。用瓦片做為屋頂建築材料的磚造房子。

【腥臊】tshenn-tshau/tshinn-tshau：又唸作tshe-tshau。指菜色豐盛。

【偕】āinn/iāng：背。專指背人。

【擲】siàn：擲、甩、打。

【拚門】lòng m̄ng：叩門、敲門。

【跤盤】kha-puānn：腳背、腳面。

【煙筒管】ian-tāng-kóng：煙囪。

【跔踏】thún-tàh：不知珍惜的用腳踐踏。

【喙空】tshui-khang：口腔、嘴巴。

【稀微】hi-bî：寂寞、寂寥。